



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

14. Kalenderwoche – ab 02. April 2011

Resdrisigo

Manschma dun misch de Grien ärschorn! Ährlisch - de Grien, mid dor Frau Rodh an dor Schbidze!
Die, wo ooch ma dor Joschga Fischor gewähsn is. Genau - de griene Bardei! Ja, die dun misch
ärschorn! Immor, wenn in dor Weld e Ungligg bassiern dud, da schdehn die da un sachn: Wir hams
ja gewussd, abor off uns had keenor geheerd!

Jezde nu widdor bei der Gadaschdrofe in Schabahn! Da schdehn die da mid schdolz geschwollnor
Brusd... - als wie wenn die selbor die Dsunamie ausgeleesd häddn! - un driumfiern! Mir hamms ja
immor gesachd - Adom is gefährlich!

De Grien sinn irschendwie genau so neunmaschlau wie meine Gudste! Die sachd ooch immor...
zum Beischbiel, wenn isch een Schnubbn hab... - isch hab dir doch gesachd, dass du een Hud
offsedzn sollsd, wens draußn reeschnen dud!

Ja, meine Gudste weeiß ooch jedes Ungligg schon im vorneweg! Die had schon vor Jahren gesachd,
dass wenn isch weidor soviel Bier drinkn du, dass isch dann eene Wambe grisch. Un nu, wo isch de
Wambe hab, schdehd se da un sachd, se häddes mir ja schon immor gesachd!

Abor was hädde isch denne machn solln? Kee Bier mähr drinkn? Bloß weil isch irschendwann ma
eene Wambe ham du? Das is doch, als wie wenn isch offheern däde zu lähm, bloß weil isch
irschendwann ma schdärm muss!

Nee, solsche Schlaumeior, die immor wissn, was schädlich is, was mor eischendlich nisch machn darf... - irschendwie dun die misch ärschorn. Weil die ehm ooch e bißl Reschd ham! Leidor.

Abor es dud off dor annorn Seide ehm nischd gähm, was de machn kannsd, wo kee Risigo dabei is. Alles is irschendwie gefährlich! E Resdrisigo hasde ooch, wensde im Bedde lieschn bleibsd un nisch offschdehn dusd. Ja, da kannsd gladd vorhungorn!

Was misch allordings wundorn dud, das is, dass de Grien.. un ooch meine Gudste... dass die nisch geeschn de Audos meggorn dun. Nee, geeschn Lufdvorschmutzung un Dreibhauseffegd dun se weddorn, abor nisch geeschn Audos! Wahrscheinlich dun de Grien ooch so gerne Auto fahrn, wie meine Gudste. Abor nu is doch grade das Autofahrn sowas von saugefährlich!

Drodz dass de Deschnig immor bessor wern dud, is de Gefahr, dass de disch mid deem Auto zu Dode fahrn dusd, greeßor, als wie de Gefahr, dass de an dor Adomschdrahlung schdärm odor im Bedde vorhungorn dusd.

Abor bei Audos dun alle das Resdrisigo hinnemm. Da wird nisch driebor disgudierd. Abor Adom?

Wobei, isch bin ja keenor, dähr nu Adom ins Härz geschlossn had... - nee! Abor wenn mir ehm soviel Schdrom brauchn dun, dann miss mor ehm ooch... - genau! Wenn isch ehm Bier drinkn will, muss isch ooch eene Wambe in Koof nemm! Wobei... - geeschn de Wambe kannsd ja noch was machn! Abor e Resdrisigo dud bleim - fiehr de Lähbor!

Eduard Sachsenmeyer